



人代紀要卷之九

明吳興顧應祥編集

大埔黃宸校刊 江陰湯明善校正

庠生倪佩 臧繼華同校

癸未漢淮陽王更始元年

春二月新市平林兵以兵多無統欲立劉氏以從人望畏演威明時戴侯曾孫劉玄在平林兵中遂立為帝改元更始以劉演為大司徒劉秀為太常偏將軍

三月劉秀徇昆陽定陵鄆皆下之

五月王莽遣司徒王尋司空王邑會嚴尤陳茂等兵四十二萬以長人巨無霸爲壘尉驅虎豹犀象諸猛獸助威旌旗輜重千里不絕以攻昆陽劉秀以數千人破之會大雷風屋瓦皆飛雨下如注虎豹皆股栗士卒溺死以萬數水爲不流王尋被誅王邑尤茂脫走獲其軍實輜重不可勝筭關中震恐海內豪傑翕然響應皆殺其牧守自稱將軍用漢年號以待詔命

岑彭以宛城降更始入都之封彭爲歸德侯更始以諸將譖殺大司徒劉縯以劉秀爲破虜大

將軍

時新市平林諸將以劉縯兄弟威名益盛陰勸更始除之縯部將劉稷勇冠三軍聞更始立不平更始乃與諸將謀收稷殺之併殺縯

王莽衛將軍王涉聞道士西門君惠云劉氏當興國師姓名是也遂與國師劉秀大司馬董忠謀劫莽降漢事泄俱自殺

王莽聞漢兵言其醜殺平帝乃會公卿發請命金滕之策泣示群臣憂懣不能食但飲酒啗鰓魚讀軍書倦因馮几寐不復就枕

鰓魚本草石決明

成紀隗囂起兵應漢

南陽宗成起兵徇漢中以應漢公孫述擊殺之據成都

劉望稱帝汝南以嚴尤陳茂爲將相更始兵擊敗殺望及尤茂

漢兵取洛陽入關王莽計無所出率群臣至南郊陳符命仰天大哭氣盡伏而叩頭諸生小民旦夕會哭甚悲哀者除以爲郎赦囚徒授兵殺豨與誓曰有不爲新室者社鬼記之度渭橋皆散去衆兵發莽妻子父祖冢燒其棺槨及九廟明堂辟雍火

照城中九月朔兵入火及掖庭黃皇室主曰何面見漢家自投火中而死王莽避火宣室前殿火輒隨之莽紺袍服持虞帝匕首天文郎按式於前旋席隨斗柄而坐曰天生德於予漢兵其如予何群臣扶之漸臺衆兵登臺斬其首節解鬻分之傳首宛縣百姓共提擊之或切食其舌

王莽自丙寅年居攝己巳年僭位至是凡十八年而亡

冬十月更始遷洛分遣使徇郡國以彭寵爲漁陽太守

樊崇降復叛 封劉永為梁王

以劉秀為大司空徇河北

以劉賜為丞相入關修宗廟宮室

十二月卜者王郎詐稱成帝子子輿惑眾劉林等信之與趙國豪傑入邯鄲立為天子徇下幽冀諸郡響應

是年大司馬秀納新野陰氏為夫人是為陰貴人初劉秀適新野聞陰氏美又至長安見執金吾車騎盛嘆曰仕宦當作執金吾娶妻當得陰麗華至是遂納陰氏

甲申 更始帝遷都長安居長樂宮 封宗室祉為定陶

王慶為燕王歙為元氏王嘉為漢中王賜為宛王

信為汝陰王 功臣王匡為泚陽王王鳳為宜城

王朱鮪為膠東王王常為鄧王申屠建為平氏王

陳牧為陰平王衛尉將軍張卬為淮陽王執金吾

廖湛為穰王尚書胡殷為隨王將軍李通為西平

王五威中郎將李軼為舞陰王水衡將軍成丹為

襄邑王驃騎將軍宗佻為潁陰王尹尊為郾王惟

朱鮪不受以為左大司馬李松為丞相趙萌為右

大司馬納萌女為夫人委政於萌日夜飲讌濫授

官爵人心失望

上谷太守耿弇歸大司馬秀以爲長史

秀北徇冀冀城反應王郎秀出南馳至蕪葦亭馮異進豆粥至滹沱河乏船濟王霸恐驚衆詭言冰合至河冰果合得渡冰復解馮異復進麥飯入信都太守任光和我太守邳彤舉郡降真定王楊起兵應王郎衆十餘萬秀遣人說降納楊甥郭氏爲夫人是爲郭貴人

大司馬秀得賈復祭遵爲將軍

秀拔廣阿耿弇以上谷漁陽二郡兵至與寇恂吳

漢等進擊邯鄲克之斬王郎

更始封大司馬秀爲蕭王

蕭王擊破銅馬諸賊收其衆徇河內俱降

公孫述自稱蜀王

赤眉西攻長安

蕭王遣鄧禹將兵入關寇恂守河內馮異拒洛陽自引兵徇燕趙

更始以隗囂爲御史大夫

梁王永據國起兵 秦豐據黎丘自號楚黎王

乙酉漢世祖光武皇帝建武元年

春正月平陵人方望立前孺子劉嬰稱帝臨涇更始遣兵擊斬之

夏四月公孫述稱帝于蜀號成家建元龍興

夏六月蕭王秀即皇帝位于鄗南年三十歲是爲漢光武皇帝改元建武

諸將請蕭王即帝位不許會儒生彊華奉赤伏符自關中來曰劉秀發兵捕不道四夷雲集龍

鬪野四七之際火爲主群臣奏請遂即位

張卬等謀劫更始長安亂更始奔趙萌于新豐

赤眉以劉盆子稱帝

赤眉至華陰或勸立宗室以巫言求城陽景王

五世孫式侯萌之子三人恭茂及盆子書札爲

符置笥令探之盆子最幼探得符諸將咸稱臣

拜盆子時年十五爲卒史劉俠卿牧羊被髮徒

跣見衆拜恐畏欲啼茂曰善藏符盆子齧而棄

之雖立時出與牧兒戲

秋七月以鄧禹爲大司徒王梁爲大司空吳漢爲

大司馬伏湛爲尚書令

九月廢更始帝玄爲淮陽王

以循吏卓茂爲太傅封褒德侯

朱鮪以洛陽降始都洛陽

淮陽王遣劉恭降于赤眉赤眉入長安

十一月梁王永稱帝

十二月赤眉殺淮陽王

隗囂據天水郡稱西州上將軍

竇融據河西稱五郡大將軍

盧芳據安定自稱西平王匈奴迎之立以為漢帝

丙戌

封功臣為列侯 立郊廟社稷于洛陽

長安城中糧盡赤眉大掠安定北地

鄧禹入長安修陵廟

王梁罷以宋弘為大司空 漁陽太守彭寵反

封叔父良為廣陽王兄演子章為太原王興為魯

王淮陽王子三人俱列侯

六月帝以陰貴人雅性寬仁欲立為后貴人以郭

貴人有子不肯當乃立郭貴人為皇后后子彊為

皇太子

赤眉發掘諸陵復入長安鄧禹走雲陽徵還京師

青徐盜張步降遣光祿大夫伏隆拜步為東萊太

守

丁亥 立四親廟於洛陽祀父南頓君以上至春陵節侯

卷之六
馮異破赤眉長安平得傳國璽以劉盆子為趙王
郎中賜樊崇等田宅

劉永立董憲為海西王又遣使立張步為齊王步
留伏隆不從步殺隆

以伏湛為大司徒

涿郡太守張豐反彭寵自稱燕王

睢陽人斬劉永以降其部將復立永子紆稱梁王
李憲稱帝淮南

戊子

耿弇祭遵討張豐斬之豐好方術有道士言當為
天子以五絲囊裹右繫豐肘日中有玉璽豐信之

遂反至當斬猶曰肘石中有璽傍人推碎之方知
被詐曰當死無恨

以侯霸為尚書令

隗囂遣馬援奉書入見

巳丑

彭寵奴子密斬寵首降封不義侯

竇融遣使奉書以為涼州牧 秦豐降斬之

梁人斬劉紆以降

耿弇破張步帝遣人告步能相斬以降封列侯步
乃斬蘇茂以降齊地悉平以張步為安丘侯

伏湛免以侯霸為大司徒

徵處士周黨嚴光王良至京師黨光不屈以良爲
諫議大夫

周黨入見伏而不謁自陳願守所志博士范升
奏毀之曰伏見太原周黨東海王良山陽王成
等蒙受厚恩三聘乃肯就車陛見帝廷伏而不
謁偃蹇驕悍同時俱逝黨等文不能演義武不
能死君鈞采華名庶幾三公之位等語書奏帝
曰周黨不受朕祿亦各有志其賜帛四十匹隱
居著書而終

嚴光會稽餘姚人與光武同學光武即位變名
姓隱居不見物色求之使三反而後至舍於北
軍帝即日幸其館引入論道故舊累日與之共
卧拜諫議大夫不受歸耕富春山中年八十終
于家賜錢百萬穀千斛

王良後歷沛郡太守大司徒司直在位恭儉布
被瓦噐妻子不入官舍後以病歸一歲復徵過
其友人拒不肯見曰不有忠言奇謀而取大位
何其往來屑屑不憚煩也良慙後徵不應卒于
家

按光武即位汲汲於舉循吏徵隱士真三代以

下之賢君也故備錄之

是年初起太學 立五經博士十四家

易有施孟梁丘京氏書歐陽大小夏侯詩齊魯

韓毛春秋嚴顏禮大小戴

庚寅 馮異擊破盧芳安定平 隗囂降蜀

宋弘免

辛卯 公孫述立隗囂為朔寧王

李通為大司空 詔百僚上封事不得言聖

壬辰 潁川盜起自將討平之

癸巳 隗囂卒子純立

封貴人弟陰就為宣恩侯復欲封其兄興固辭不受

甲午 馮異卒于軍 隗純降隴右悉平

乙未 自將伐蜀 公孫述使盜刺殺岑彭

丙申 吳漢拔成都誅公孫述蜀平 李通罷

以譙玄不受公孫述徵而死立祠

竇融入朝以為冀州牧

丁酉 侯霸卒 詔大官勿受郡國異味

詔諸王降為公侯

以韓歆為大司徒竇融為大司空

戊戌

韓歆直言免自殺

丁酉

庚子

丙申

辛丑

甲子

以歐陽歆為大司徒尋下獄死戴涉為大司徒交趾女子徵側徵貳反九真日南合浦蠻俚皆應之
盧芳降立以為代王
郭后寵衰數懷怨懟廢為中山王太后以后中子右翊公輔為中山王以常山郡益中山國徙封后弟郭況大國為陽安侯
蒞車王賢遣使奉獻以為漢大將軍

以馬援為伏波將軍討交趾

壬寅

盧芳復反奔匈奴
是年罷州牧復刺史

癸卯

五官中郎將張純與太僕朱浮言禮為人子事大宗降其私親當除今親廟四以先帝四廟代之大司徒戴涉等奏立元成哀平四廟帝自以昭穆次第當為元帝後遂追尊宣帝為中宗始祠昭帝元帝於太廟成哀平帝於長安徙春陵節侯以下四親廟於章陵

胡寅曰王莽篡時漢祚既絕光武掃平禍亂奮

然崛起雖祖高祖而帝四親非與哀朝尊崇藩
統同事於義未有大不可者一聞純等建議斷
然從之章陵四祠茂有異等寡恩之譖不聞於
當年失禮之議不生於後代以是較之宣哀過
舉益明而禮所載爲人後者爲其父母降而不
得祭豈可違而不守哉

愚按光武崛起民間興復漢室原不曾爲元帝
之嗣豈可自比於爲人後而絕其天性之親乎
况四親廟立于章陵皆太守令長侍祠身爲天
子而不得躬祀其考妣是知有天下而不知有

父母也豈得爲孝乎只宜祖高祖而帝四親方
爲得體

馬援斬徵則徵貳

夏六月太子彊以母廢不安郅憚說其辭位降爲
東海王以陰后子東海王陽爲皇太子更名莊
帝以陰后弟陰興賢欲以大司徒興固辭從之
以沛國桓榮爲議郎授太子經車駕幸太學辨明
經義詔諸儒生雅歌擊磬

左中郎將鍾興授皇太子及宗室諸侯春秋賜爵
關內侯辭以無功帝曰教太子及諸王侯非功耶

興曰臣師火府丁恭於是復封恭而興固辭不受
按光武時多謙讓之風皆上有以作興以成之
也故錄之

賜雒陽令董宣錢三十萬

陳留董宣爲雒陽令湖陽公主奴白日殺人匿
主家主出以奴驂乘宣候之叱奴下車格殺之
主訴帝召宣欲善殺之宣曰陛下聖德中興而
縱奴殺人將何以治天下不須善臣請自死以
頭擊楹流血被面帝令小黄門持之使叩頭謝
主宣不從強使頓之宣兩手按地終不肯俯主

曰文叔爲白衣時截亡匿死吏不敢至門今爲
天子威不能行一令乎帝笑曰天子不與白衣
同敕彊項令出賜錢三十萬宣悉以班諸吏由
是京師莫不震悚夫宣之所以得伸其直氣者
光武能容之故也後之爲人君者宜鑒之

甲辰 大司徒戴涉坐入故太倉令奚涉罪下獄死以三
公連職大司空竇融坐免

大司馬吳漢卒帝親臨問所欲言止曰無赦
以廣漢太守蔡茂爲大司徒太僕朱浮爲大司空
徙中山王輔爲沛王以廢郭后爲沛太后

以郭况爲大鴻臚數幸其第賞賜金帛豐盛京師
號爲金穴

乙巳 西域十八國遣子入侍請都護不許

丙午 朱浮免以杜林爲大司空

丁未 蔡茂卒王况爲大司空

杜林卒張純爲大司空

戊申 馬援征武陵蠻

巳酉 貊人鮮卑烏桓並入朝貢

新息侯馬援師困壺頭中炎毒卒被中郎將梁松
譖收其印綬

遼西烏桓內屬

庚戌 增百官俸

初作壽陵戒無爲山陵陂池使迭興之後與丘隴
同

詔南單于入居雲中又徙西河

始定禘祫制

辛亥 詔三公去大名改司馬曰太尉

王况卒趙熹爲太尉馮勤爲司徒

壬子 徙魯王興爲北海王以魯益東海以東海王彊去
就有禮故優以大封賜虎賁旄頭設鐘簋擬於乘

輿

夏六月沛太后郭氏薨

捕諸王賓客 遣諸王就國

以張佚為太子太傅桓榮為少傅

北匈奴乞和親

癸丑

甲寅 東巡狩群臣言宜封禪太山不許

膠東侯賈復卒

乙卯

丙辰中元年 四月改

春正月以第五倫為會稽太守

春二月東巡幸魯封泰山禪梁陰夏四月還宮大

赦改元 張純卒以馮魴為司空

馮勤卒以李訢為司徒

京師醴泉出飲之痼疾皆愈又赤草生于水涯

郡國頻上甘露降群臣請太史撰集不許

上薄太后尊號曰高皇后配食地祇遷呂太后廟

主于國四時上祭

以后配祭地祇起于王莽之議議者謂其諂事

元帝后故也

起靈臺辟雍宣布圖讖于天下

給事中桓譚上疏非讖帝怒將下斬之叩頭流血

良久方解出為六安郡丞

是年南單于比死第莫立

丁巳 春正月初立北郊祀后土 東夷倭奴國入貢

二月帝崩在位三十四年壽六十二謚光武皇帝

葬原陵廟號世祖太子莊即位尊陰皇后曰皇太

后

以鄧禹為太傅東平王蒼為驃騎將軍

戊午漢顯宗孝明皇帝永平元年

東海王彊病遣使者太醫乘驛視疾絡繹不絕尋

卒悲慟使大司空持節護喪贈送殊禮

高密侯鄧禹卒謚曰元 好時候耿弇卒

己未 宗祀光武皇帝於明堂始服冠冕玉珮登靈臺望

雲物 三月臨雍行大赦禮

冬十月行養老禮以李躬為三老桓榮為五更親

袒割禮畢引桓榮及弟子升堂諸儒執經問難冠

帶縉紳之士圜橋門而觀聽者億萬計賜榮爵關

內侯三老五更皆以二千石祿養終身

令郡國行鄉飲酒禮

郭太后少子中山王烏就國賜虎賁官騎恩寵尤厚帝禮待陰郭每事必均

庚申 趙憙李訢免以郭丹爲司徒虞延爲太尉

立馬援女馬氏爲皇后子烜爲皇太子

圖畫功臣於雲臺

鄧禹吳漢賈復耿弇寇恂岑彭馮異朱祐祭遵
景丹蓋延姚期耿純臧宮馬武劉隆馬成王梁
陳俊杜茂傅俊堅鐔王霸任光李忠萬修邳彤
劉植又益以王常李通竇融卓茂合三十二人
馬援以椒房之親不與

荆州刺史郭賀有殊政錫以三公服

辛酉 郭丹馮魴免以范遷爲司徒伏恭爲司空

梁松坐怨望下獄死

是年于竇攻殺莎車王賢

壬戌 竇融卒

癸亥 禁章奏浮詞

甲子 皇太后陰氏崩謚光烈

九江守宋均有善政召爲尚書令

乙丑 范遷卒以虞延爲司徒

冬十月帝夢金人佛法始入中國

詔聽有罪亡命者贖

鄭眾使匈奴不屈節召為軍司馬

初帝為太子眾以通經知名太子及山陽王荆因梁松以東帛請之眾曰太子儲君無外交之義漢有舊防藩王不宜私通賓客松曰長者意不可逆眾曰犯禁觸罪不如守正而死遂不往後松敗賓客多坐之眾不為染若眾者惟其能守正於平時故臨難而不屈也

丙寅

詔司隸刺史歲考所部長吏殿最

匈奴遣子入學

始置中官員中常侍四人小黄門十人

闕宦置員始此然不過十四人而已

丁卯

廣陵王荆有罪自殺國除

戊辰

東平王蒼來朝

灑湖出黃金廬江太守以獻

己巳

哀牢夷內附置哀牢博南二縣

修泝渠堤

伏恭罷牟融為司空

庚午

楚王英信方士奉佛是年以罪廢徙丹陽自殺

辛未

虞延以知英謀不告自殺邢穆為司徒 作壽陵

壬申

至魯詣孔子宅

癸酉

大發兵伐匈奴 西域復通

淮陽王延驕奢御下嚴烈人告其作圖讖祝詛徙
阜陵王止食二縣司徒邢穆連坐下獄死以王敏
爲司徒

甲戌 王敏卒鮑昱爲司徒 白狼槃木諸國入貢
復置西域都護戊巳校尉

乙亥 秋八月帝崩在位十八年壽四十八謚孝明皇帝
廟號顯宗塋顯節陵遺詔無起寢廟藏主於光烈
皇后更衣別室陵制石槨廣一丈二尺長一丈五
尺無得起墳

太子烜即位年十八顯宗第五子是爲章帝尊皇
后爲皇太后
以趙熹爲太傅牟融爲太尉並錄尚書事
錄尚書之名始此
以第五倫爲司空

丙子漢肅宗孝章皇帝建初元年
詔二千石勸農桑慎選舉順時令理冤獄

丁丑 帝欲封爵諸舅馬太后不許
戊寅 立竇勲女貴人竇氏爲后

以外戚馬防爲車騎將軍
有司請諸王歸國不許

已卯 牟融卒以鮑昱為大尉 桓虞為司徒

夏四月立宋貴人子慶為皇太子封皇子伉為千

乘王全為平春王

封馬廖為列侯以特進就第

有司請封諸舅帝以天下豐稔方隅無事從之

太后聞之曰吾少壯時但慕竹帛志不顧命今

雖已老猶戒之在得故日夜惕厲思自降損何

意老志不從萬年之日長恨矣廖等辭讓不許

乃受爵而辭位皆以特進就第

夏六月皇太后馬氏崩謚明德

帝為太后所養專以馬氏為外家生母賈貴人

不登極位親族無受寵榮者馬太后崩但加貴

人王赤綬安車一駟宮人二百雜帛黃金錢二

千萬而已

詔諸儒會白虎觀議五經同異

庚辰 以直言士補外官試以職 太傅趙熹卒

西域假司馬班超擊疏勒破之

辛巳 鮑昱卒鄧彪為太尉 廉范為蜀郡太守

以四科取士

一曰德行高妙志節清白二曰經明行脩能任

博士三曰能曉法律足以決疑能按章覆奏文
任御史四曰剛毅多畧遭事不惑明足以照奸
勇足以斷決才任三輔

壬午 廢太子慶爲清河王立梁貴人子肇爲皇太子

竇皇后無子以梁竦女梁貴人子肇爲已子誣
宋貴人爲厭勝之術廢慶宋貴人飲藥自殺慶
雖幼知避禍口不言及宋氏帝憐之敕皇后衣
服與太子齊等太子亦親愛慶

東平王蒼歸國

癸未 東平王蒼卒

梁竦被竇后譖下獄死

太子肇立梁氏私相慶后忌之諸竇遂飛書陷
竦以惡逆下獄死家徙九真竦二女皆貴人俱
憂卒

后兄竇憲益貴盛奪公主田不問

以班超爲西域將兵長史徐幹爲軍司馬

甲申元和元年 八月方改

詔議貢舉法

大鴻臚韋彪言其畧曰求忠臣必於孝子之門
忠孝之人持心近厚鍛鍊之吏持心近薄士宜

以才行爲先不可純以閥閱又曰天下樞要在於尚書而間者多從郎官超升雖曉習文法長於應對然察察小慧類無大能宜鑒晉夫捷給之對深思絳侯木訥之功按此數語頗足以警時弊故錄之

秋七月詔禁治獄慘酷者

八月鄧彪罷以鄭弘爲太尉

詔以道化不德吏政失和改元和元年

朱暉爲尚書僕射阻煮鹽均輸法

毛義鄭均以行義賜穀千斛

乙酉

春正月詔賜民胎養穀

詔戒吏矯飾者曰俗吏矯飾外貌似是而非朕甚厭之甚苦之安靜之吏悃幅無華日計不足月計有餘如襄城劉方吏民同聲謂之不繁雖未有他異斯亦近之矣夫以苛爲察以刻爲明以輕爲德以重爲威四者或生則下有怨心勉思舊令稱朕意焉 行編訢造四分曆

二月東巡耕定陶柴告岱宗有黃鵠三十從西南來宗祀明堂

至魯祠孔子 至東平祠獻王陵哭泣盡哀

詔定律毋以十一月十二月報囚

丙戌 鄭弘因數陳竇憲權勢太盛收印綬自繫獄出而卒宋由爲太尉 第五倫罷袁安爲司空 疏勒王詐降班超斬之

丁亥章和元年七月以嘉瑞改元

桓虞免袁安爲司徒任隗爲司空

班超發諸國兵擊降莎車 曹褒定禮

戊子 春正月帝崩在位十二年壽三十一謚孝章皇帝

廟號肅宗葬敬陵

太子肇即位年十歲是爲和帝尊皇后竇氏爲皇

太后臨朝稱制后兄憲供養兩宮備宿衛

以鄧彪爲太傅錄尚書事百官總已以聽

諸王始就國

都鄉侯暢來吊國憂太后數召見之竇憲恐其分

權遣客刺殺之而歸罪于暢弟剛使侍御史與青

州刺史雜考之侍御史何敞推得其意憲懼誅求

擊匈奴以贖死乃以竇憲爲車騎將軍執金吾耿

秉爲副以鄧訓爲護羌校尉擊迷唐破之

巳丑漢孝和皇帝永元元年

尚書僕射鄧壽論竇憲下獄何敞論救減死徙合

浦未行自殺

夏六月竇憲破北匈奴登燕然山刻石勒功而還
為大將軍位三公上封武陽侯

會稽山崩

庚寅 封皇弟壽為濟北王開為河間王淑為城陽王
北單于款塞來朝竇憲遣兵擊破之

辛卯

春正月帝冠用曹褒新禮

二月竇憲擊破北匈奴於金微山單于走死

尚書僕射欒恢論竇憲免歸憲風令郡縣逼脅飲
藥死

冬十月帝如長安竇憲來會尚書以下議拜伏稱
萬歲韓稜不從而止

龜茲姑墨濕宿諸國來降

以班超為西域都護騎都尉

壬辰

春正月立北匈奴於除鞬為單于

北匈奴單于既亡其弟於除鞬遣使款塞竇憲
請立為單于置中郎將領護如南單于故事袁

安任隗以為宜令南單于反北庭領降眾無緣
復立於除鞬以增國費帝竟從憲請

千乘王伉薨子寵嗣是為夷王

封皇弟萬歲為廣宗王

袁安卒以丁鴻為司徒

竇憲謀逆帝知之與宦者鈞盾令鄭眾密謀收其印綬更封冠軍侯遣就國逼令自殺

竇氏宗族賓客皆免歸故郡班固素為憲典文章至是死獄中嘗著漢書未就詔固女弟曹壽妻昭踵成之

鄭眾以誅竇憲功為大長秋

宋由以竇憲黨策免自殺尹睦為大尉錄尚書事任隗卒劉方為司空

王禕曰方竇氏得志時袁安任隗力持正議而宋由依違其間人莫不以由為得計而為安隗危之也然由被惡名不得其死安隗善終牖下名昭史冊後之依人勢以圖富貴者盍鑒之哉
鄧訓卒迷唐復反

癸巳

北匈奴單于於除鞬叛還北遣兵討滅之鮮卑徙據其地匈奴餘種尚十餘萬皆號鮮卑其勢頗盛
尹睦卒以張輔為太尉

南匈奴單于屯屠何死單于宜弟安國立

廣宗王萬歲薨無嗣國除

甲午 使匈奴中郎將杜崇等殺安國立左賢王師子為單于

丁鴻卒以劉方為司徒張奮為司空

城陽王淑薨無子國除

班超發八國兵討焉耆斬其王廣

北匈奴降者脅立屯屠何子逢侯叛走出塞遣將

軍鄧鴻等擊之不及鴻坐逗留杜崇坐失胡和致

胡反皆徵下獄死

乙未 千乘夷王寵改國樂安

丙申 立貴人陰氏為皇后

丁酉 竇太后崩三公請貶尊號不宜合葬先帝帝不從

追尊生母梁貴人為恭懷皇太后葬西陵

劉方策免自殺呂蓋為司徒

張奮罷韓稜為司空

戊戌 韓稜卒巢堪為司空 迷唐詣闕貢獻

南單于師子死單于長之子檀立

己亥

庚子 張酺免張禹為太尉

辛丑 呂蓋致仕魯恭為司徒 詔邊郡舉孝廉

壬寅 皇后陰氏以妬廢死立鄧禹孫貴人鄧氏為后

征班超還京師

封宦者鄭眾為鄴鄉侯 巢堪罷徐防為司空

癸卯 詔大官勿受遠國珍羞

甲辰 魯恭免以張酺為司徒尋卒徐防代以陳寵為司

空

北匈奴請和親不許

乙巳元興元年夏四月改元 五月雍地裂

冬十二月帝崩在位十七年壽二十七謚孝和皇

帝廟號穆宗葬慎陵帝失皇子十數後生者隱蔽

養於民間至是收入長子勝有痼疾乃立少子隆

為太子即位是為殤帝生百餘日尊鄧皇后為皇

太后臨朝

丙午漢孝殤皇帝延平元年

以張禹為大傅徐防為太尉參錄尚書事

封帝兄勝為平原王 以梁鮪為司徒

清河王慶始就國加殊禮慶子祐年十三太后以

帝幼弱慮不虞留祐與嫡母耿姬居清河邸

罷祀官不在禮典者

鮮卑入寇漁陽太守張顯戰歿

以太后兄鄧騭為車騎將軍儀同三司

人代紀要 卷之九
陳寵卒以尹勤爲司空

太后減大官導官尚方內署諸服御珍膳朝夕一肉飯而已郡國所貢皆減過半斥賣上林鷹犬離宮別館又遣掖庭宮人及宗室没入者皆爲庶民實覈水災傷害除其田租

秋八月帝崩在位一年年二歲謚孝殤皇帝葬康陵以清河王子祐爲長安侯爲和帝嗣即位是爲安帝太后猶臨朝詔檢救鄧氏賓客勿相容護

罷魚龍曼延戲

以樊準言舉隱逸選博士

冬十二月清河王慶卒年二十九歲子虎威嗣是爲愍王分清河爲二國以少子常保爲廣川王

八代紀要卷之十

明吳興顧應祥編集

大埔黃宸校刊 江陰湯明善校正

庠生倪佩 臧繼華同校

丁未漢孝安皇帝末初元年

梁鮪卒魯恭為司徒

封鄧騭及其弟惺弘閻皆為列侯騭辭不受

罷西域都護及伊吾盧柳中屯田

以寇盜雨水策免太尉徐防司空尹勤

以災異策免三公始此按光武戒強臣竊命雖

置三公事歸臺閣不過備員而已至於失政則加譴責以致外戚專權閹宦用事蓋由於此

以張禹為太尉周章為司空

冬十月倭國遣使奉獻

十一月司空周章以平原王勝非痼疾密謀廢帝

立勝事覺自殺以周敏為司空

戊申 以公田賦與貧民

五月旱太后錄囚而雨 秋八月太白入北斗

廣川王常保卒無嗣國除

以鄧騭為大將軍辟弘農楊震

巴西 帝加元服 令吏民入錢穀拜官

魯恭罷 海賊張伯路寇海濱九郡

烏桓鮮卑南匈奴合兵寇五原

庚戌 張伯路降復叛入海島

謁者劉珍等校定東觀五經諸子百家

辛亥 地震 張禹免李脩為太尉

壬子 周敏罷以劉凱為司空

癸丑 鄧太后率大臣命婦謁宗廟 平原王勝卒

甲寅元初元年 春正月改元

二月日南地坼長一百八十二里廣五十二里

李脩罷司馬苞爲太尉

乙卯 夏四月立貴人閻氏爲皇后

后性妬後宮李氏生子保鳩殺李氏

武都太守虞詡破羗

司馬苞罷以馬英爲太尉

劉凱爲司徒袁敞爲司空

丙辰 以劉凱言聽大臣二千石刺史行三年喪

丁巳 袁敞不阿權貴忤太后旨策免自殺以李郃爲司

空 任尚募羗殺零昌擊先零羗狼莫大破之

戊午 鄧遵募羗殺狼莫封遵武陽侯任尚爭功檻車徵

棄市羗叛十餘年間軍旅之費二百四十餘億死者不可勝數至是零昌狼莫死羗始瓦解

己未 太后徵和帝弟濟北河間王子女及鄧氏近親子

孫開邸教學躬自監試又以河間王子翼爲平原

懷王勝後留京師時帝多失德不可太后意帝乳

母王聖慮有廢置與宦者中黃門李閏江京共毀

短太后帝信之忿懼 千乘夷王卒子鴻嗣

庚申未寧元年 四月改

北匈奴車師後王共殺漢吏以班勇言復置都護

屯兵

濟北王壽卒封其子萇為樂成王

夏四月立後宮李氏所生子保為皇太子年六歲

改元 封河間王子翼為平原王

劉凱免以楊震為司徒李郃免陳褒為司空

太后從弟越騎校尉鄧康以太后久臨朝憂懼不朝后遣內人責之內人誣康言不遜太后怒免就

國

辛酉建光元年 七月改

春三月鄧太后崩臨朝十七年壽四十一謚和熹

合葬順陵封鄧騭為上蔡侯 樂安王寵卒

追尊清河孝王慶曰孝德皇妣曰孝德后

尊嫡母耿姬為甘陵大貴人

樂成王萇有罪廢為臨湖侯

以尚書陳忠言舉有道之士

汝南薛包有行義徵拜侍中辭歸

宮人誣太后兄弟悝弘闇先年謀立平原王帝追

怒令有司奏悝等大逆無道遂廢悝子葉侯廣宗

京子陽安侯珍弘子西平侯廣德都鄉侯甫德闇

子西華侯忠皆為庶人騭不與謀但免特進遣就

國宗族皆免官沒入貲財田宅徙遠郡郡縣逼迫

廣宗忠自殺徙隲羅侯隲與子鳳俱不食死從弟
 河南尹豹度遼將軍舞陽侯遵將作大匠暢俱自
 殺廣德兄弟以母閹后戚屬得留京師徵鄧康為
 太僕賤平原王翼為都鄉侯遣歸河間翼閉門謝
 客以免禍後順帝末建五年其父河間孝
 王請分蠡吾縣封翼為蠡吾侯
 穎川杜根以太后不歸政上書太后怒盛以練囊
 撲死復蘇至是召為侍御史平原成詡世請太后
 歸政獲罪召為尚書郎

鄧太后好學術崇節儉戒抑宗族臨朝類多善
 政可謂賢矣但以久不歸政群小側目嗣主積
 忿致有此禍然建光以後政事日非則臨朝之
 功不可誣也史謂杜根逃竄宜城山中酒家保
 一十五年則上書之時后亦稱制未久無乃逢
 其怒乎

封宦者江京李閹為列侯閹后兄弟顯景羅並典
 禁兵與中常侍樊豐劉安陳達及王聖聖女伯榮
 扇動中外傳通姦賂楊震疏諫不聽
 幸衛尉馮石第留飲十日以劉凱為太尉

冬十一月地裂
 復斷大臣行三年喪

壬戌延光元年春三月改元

陳褒免劉授為司空

封河間王開子得為安平王

遼東都尉龐奮承偽詔斬玄菟太守姚光幽州刺史馮煥光被斬煥疑有偽上書徵奮抵罪

癸亥 封乳母王聖為野王君 劉凱罷楊震為太尉

劉熹為司徒 聘處士周燮馮良不至

甲子 班超子班勇擊走匈奴田車師者西域復通

二月東巡柴告太山 祀孔子于闕里

宦者樊豐等譖楊震怨懟且鄧氏故吏夜遣使策

收震太尉印綬遣還故郡震至城西几陽亭飲鴆

自殺 以馮石為太尉

以耿姬兄耿寶為大將軍

王聖樊豐等與閻后讒搆皇太子保廢為濟陰王 太僕來歷諫黜免

地震大水雨雹

乙丑 春二月帝南巡崩于乘輿后與閻顯江京樊豐等

偽云帝疾甚馳歸洛陽發喪帝在位十九年壽三

十一謚孝安皇帝廟號恭宗葬恭陵

尊皇后閻氏為皇太后以后兄閻顯為車騎將軍

定策禁中迎章帝孫濟北惠王壽之子北鄉侯懿
即位以太尉馮石爲太傅司徒劉熹爲太尉參
錄尚書事司空李郃爲司徒

閻顯忌樊豐等風有司奏貶耿寶爲亭侯追就國
寶自殺樊豐謝暉周廣俱下獄死王聖母子徙鴈
門閻景等爲鄉校威福自由

冬十月北鄉侯卒閻顯白太后祕不發喪欲更徵
諸王子閉宮屯兵自守

冬十一月中黃門孫程等迎濟陰王保即位年十
一是爲孝順皇帝誅閻顯等遷太后于離宮塋北
鄉侯以諸王禮策免司空劉授

以故太尉楊震二子爲郎贈錢百萬以禮改塋有
大鳥高丈餘集喪門前祠以中牢

封孫程等十九人爲列侯

丙寅漢孝順皇帝永建元年

議郎陳禪以閻后與帝無恩宜徙別宮以李郃言
朝太后於東宮閻太后尋崩謚安思皇后

馮石劉儔李郃俱免桓焉爲太傅朱寵爲太尉朱
張爲司徒

司隸校尉虞詡中常侍程璜等及張防竊弄威

柄繫獄論輸左校孫程等救免又薦左雄為尚書
孫程等十九人懷表上殿爭功免官徙封遠縣促

丁卯

追尊本生母李氏為恭愍皇后

朱寵朱倂罷劉光為太尉許敬為司徒

戊辰

徵孫程等還

己巳

春正月帝冠

桂陽太守文龔遠獻大珠求媚還

之劉光免龐參為太尉

許敬免劉琦為司徒

司空張皓免以王龔為司空

復安定北地上郡 分會稽為吳郡

庚午

定遠侯班始尚陰城公主主驕淫無道始殺之坐

腰斬同產皆棄市

辛未

重起太學 河間王開卒

壬申陽嘉元年

三月改

冊貴人梁氏為皇后后父商為執金吾

左雄請立孝廉課試法

癸酉

京師地坼八十五丈引敦樸士對策李固為首

龐參免施延為太尉 王龔免以孔扶為司空

是年張衡作渾天儀靈憲

甲戌 劉琦免黃尚為司徒 孔扶免以郭虔為司空

乙亥 初聽中官以養子襲爵 以梁商為大將軍

丙子永和元年 正月改

王龔為太尉 以商子梁冀為河南尹

丁丑 徵處士法真不至

戊寅 黃尚免劉壽為司徒

地震金城隴西山崩 詔舉武猛任將帥者

己卯 中常侍張逵等爭寵譖梁商與宦者曹騰孟賁謀廢立帝不聽逵等矯詔收縛騰賁帝怒下逵等獄誅之 封濟北惠王子安為濟北王

庚辰

辛巳 鞏唐羗寇三輔燒園陵

梁商卒以梁冀為大將軍不疑為河南尹

郭虔免以趙戒為司空 河間王政卒

壬午漢安元年 正月改

太尉桓焉司徒劉壽免以胡廣為司徒

遣杜喬張綱等八使分行州郡

張綱劾梁冀河南尹梁不疑十五事帝知其直而不能

用 廣陵寇張嬰作亂積十餘年梁冀欲中傷張綱以

為廣陵太守綱單車入衆皆感化南州晏然冀掩其功在郡一年卒

杜喬奏泰山太守李固政為天下第一召為將作大匠

癸未 梁州地震山裂

甲申建康元年

夏四月立子炳為皇太子改元

秋八月帝崩在位十九年壽三十謚孝順皇帝廟號敬宗葬憲陵 太子炳即位年二歲是為冲帝尊梁皇后為皇太后臨朝稱制

清河王延平卒子蒜嗣

以趙峻為太傅李固為太尉錄尚書事

京師及太原鴈門地震水湧土裂

九江盜馬勉稱帝于當塗 盜發憲陵

乙酉漢孝冲皇帝永嘉元年

春正月帝崩年三歲謚孝冲皇帝葬懷陵

梁太后徵章帝曾孫清河王蒜渤海王子纘至京

師梁冀利纘幼白太后立之是為質帝年八歲罷

蒜歸國梁太后稱制

按漢書清河王慶傳慶子祐入繼和帝為安帝

子虎威嗣封清河王三年薨無子鄧太后以樂安王寵子延平嗣清河王後蒜乃延平之子也又考千乘王伉傳伉子寵改國樂安寵子鴻以樂安卑濕改封渤海續乃鴻之子也蒜與續皆樂安王寵之孫千乘王伉之曾孫

廣陵賊張嬰復據郡叛

九江都尉滕撫討馬勉平之

冬十一月歷陽盜華孟稱帝滕撫擊張嬰及孟俱斬之東南悉平撫性方直爲宦者所惡胡廣希旨奏黜之卒

丙戌漢孝質皇帝本初元年

詔郡國舉明經詣太學受業者歲滿課試拜官有差五月徙樂安王鴻爲渤海王

夏閏六月帝因朝會目梁冀曰此跋扈將軍也冀惡之使左右置毒煮餅以進帝食苦煩甚召李固曰食餅腹悶得水尚可活冀曰恐吐不可飲水語未絕而崩在位二年年九歲謚孝質皇帝葬靜陵初安帝貶平原王翼爲都鄉侯遣歸河間安帝崩順帝永建五年河間孝王開請分蠡吾縣以侯之翼卒子志嗣爲蠡吾侯梁太后欲以女弟妻志徵

至夏門亭會帝崩時朝議俱屬清河王蒜中常侍
曹騰惡蒜說梁冀曰清河王嚴明立之必為將軍
禍不如立蠡吾可保富貴冀然其言胡廣等畏冀
皆曰惟將軍令李固杜喬獨守原議冀白太后策
免李固迎蠡吾侯志立之年一十五是為桓帝太
后猶臨朝 胡廣為太尉趙戒為司徒袁陽為司
空

追尊祖河間孝王曰孝穆皇夫人趙氏曰孝穆皇
后考蠡吾侯曰孝崇皇母區氏曰孝崇博園貴人
丁亥漢孝桓皇帝建和元年

正月朔日食 胡廣罷杜喬為太尉

渤海王鴻薨立弟悝為渤海王 杜喬免

立太后女弟梁氏為皇后 以司徒趙戒為太尉

司空袁湯為司徒復以太尉胡廣為司空

清河劉文反欲立清河王蒜事覺誅之蒜坐貶尉
氏侯徙桂陽自殺梁冀誣構李固杜喬下獄死京
師童謠曰直如弦死道邊曲如鉤反封侯直謂固
喬曲指冀與胡廣輩也

李固初下獄門生王調貫械上書趙承等數十
人要鈇鑕上訴太后詔赦之冀畏其終為己害

更奏前事長史吳祐爭之不從從事中郎馬融
爲作章表祐謂曰李公之罪成於卿手李公若
誅卿何面視天下人冀怒祐徑去固遂死獄中
使人脅杜喬引決不聽收下獄死暴二尸令敢
臨者加罪固弟子郭亮董班喬故掾楊匡詣闕
上書收葬皆隱去終身不仕

吳祐陳留長垣人起孝廉嘗爲酒泉太守政唯
仁簡以身率物吏懷而不欺嗇夫孫性賦民錢
市衣進父其父怒曰有君如是何忍欺之促歸
自首祐詢知其故曰掾以親故受污穢之名所

謂觀過斯知仁矣以衣給之安丘男子毋丘長
遇醉客辱其母長殺之而亡追蹤得之祐曰若
白日殺人赦若非義刑若不忍將如之何長曰
國家制法囚自犯之明府哀矜恩無所施祐問
有妻子乎曰有妻而無子也即移安丘逮其妻
入獄同宿遂懷孕冬盡當刑長泣謂母曰負母
應死何以報吳君乎齧指而吞之含血言曰若
生子名吳生也至是梁冀表祐爲長史冀誣奏
李固祐爭而不得乃自免躬灌園蔬以經書教
授年九十八而卒嗚呼東漢諸賢往往過激不

激不隨如祐者鮮矣若馬融者名爲一代鉅儒而甘爲權臣草奏以陷害忠良蓋惟知著述訓詁之爲學而昧於義利之辨故也况融又因忤冀亮徙朔方阿附亦何益哉

戊子

帝加元服

梁冀惡清河名改清河爲甘陵

己丑

趙戒免司徒袁湯爲太尉大司農張歆爲司徒

前朗陵相荀淑卒

淑少博學有高行李固李膺等咸師宗之舉賢良對策譏刺貴幸梁冀忌之出爲朗陵相泣事明治稱爲神君子八人儉緝靖壽汪爽肅事並

有名稱時人謂之八龍

庚寅和平元年春正月太后歸政大赦改元

二月梁太后崩謚順烈

加封梁冀萬戶冀妻孫壽爲襄城君

冀妻孫壽色美而善爲妖態作愁眉啼粧墮馬髻折腰步齟齬笑冀甚寵憚之與冀對街爲宅殫極土木連房洞戶柱壁雕鏤飛梁石磴陵跨水道廣開園囿珍禽異獸飛走其間有誤殺一兔者轉相告言坐死者十餘人

秋七月梓潼山崩

辛卯元嘉元年春正月大赦改元

梁冀帶劔入省尚書張陵劾之以一歲俸贖罪

梁冀弟河南尹不疑好經書喜待士冀疾之轉光祿勳以其子胤為河南尹不疑讓位歸第冀不欲其與賓客交通陰使人記其往來者馬融初除南郡太守過謁不疑冀諷有司奏融貪濁髡笞徙朔方

帝微行至梁胤府舍大風拔樹書昏尚書楊秉疏諫秉震子也

張歆罷英雄為司徒胡廣罷黃瓊為司空

帝欲褒崇梁冀使議其禮胡廣等咸稱冀功德宜比周公錫之山川土田附庸黃瓊獨曰可比鄧禹合食四縣於是有司奏冀入朝不趨劔履上殿謁讚不名禮比蕭何增封四縣比鄧禹賞賜金錢奴婢絲帛車馬衣服甲第比霍光朝會與三公絕席十日一入平尚書事冀猶以所奏禮薄不悅

壬辰 黃瓊免趙戒為司空

癸巳永興元年 五月改

宦者陳忠葬父僭禮冀州刺史朱穆案驗之徵下獄輸作左校太學生上書救免

袁湯免胡廣為太尉 吳雄罷黃瓊為司徒

趙戒免房植為司空

甲午 復聽刺史二千石行三年喪

胡廣免黃瓊為太尉尹頌為司徒 東海朐山崩

帝校獵上林遂至函谷關

泰山琅邪盜起

乙未 永壽元年 春正月大赦改元

房植免韓續為司空

丙申 青徐盜起

鮮卑檀石槐寇雲中以李膺為度遼將軍

中郎將段熲平泰山琅邪盜

丁酉 韓續為司徒孫朗為司空

戊戌 延熹元年 六月改

五月晦日食太史令陳授以為咎在梁冀冀諷洛

陽令收授考死於獄帝由是惡冀

匈奴烏桓鮮卑入寇以陳龜為度遼將軍冀與龜

有隙徵還以种暠代之龜上疏請誅冀不省遂不

食而死 黃瓊免以胡廣為太尉

己亥 復斷刺史二千石行三年喪

秋七日 皇后梁氏以奢靡妬忌帝疏之憂恚而死

八月單冀專權日久以私憾殺人甚衆掖庭人鄧香妻宣生女猛香卒宣更適孫壽舅梁紀引猛入宮爲貴人改姓梁欲認爲己女猛姊夫邴尊爲議郎冀恐其阻敗遣客刺殺之又欲殺宣宣覺馳入白帝帝與宦官單超等密謀發兵圍其第收大將軍印綬冀與孫壽即日自殺衛尉梁淑河南尹梁胤屯騎校尉梁讓越騎校尉梁戟及中外宗親皆棄市故吏賓客免黜者三百餘人朝廷爲空籍其財貨斥賣合二十餘萬萬以充王府用減天下稅租之半散其苑囿以業貧民太尉胡廣司徒韓續司空孫期俱以阿附免

史稱梁氏七侯三后六貴人二大將軍卿將尹校五十七人梁冀秉政幾二十年凶恣日積宮衛近侍並樹所親禁省起居纖微必知四方貢獻皆先輸上第於冀乘輿乃其次者百官遷召皆先到門謝恩然後敢詣尚書少忤其意托以他事陷之安帝母耿貴人薨從其從子求珍玩不得遂族其家威行於外天子拱手而已當時輔相大臣胡廣輩不惟不言又從而稱頌功德使天子獨與閹宦密計而誅之冀誅而宦官之

勢蓋張矣

立貴人鄧氏爲皇后追廢梁后爲貴人

以誅梁冀功封宦者單超爲新豐侯徐璜爲武原侯具瑗爲武陽侯左悺爲上蔡侯唐衡爲汝陽侯尋以單超爲車騎將軍

宦者侯覽進縑五千匹封高鄉侯又封小黃門八人爲鄉侯

白雲令李雲疏論宦者不當封侯下獄弘農掾杜衆論救願與同死遂併下獄死

以黃瓊爲太尉祝恬爲司徒盛允爲司空

初置祕書監

徵處士徐穉姜肱袁閎韋著李曇皆不至

庚子

宦者單超卒賜東園祕噐棺中玉具大作塋塚其四侯益橫毒流四方時人爲之語曰左回天具獨坐徐卧虎唐兩墮左悺兄爲河東太守京兆尹趙岐耻與同列棄官歸以唐衡兄代京兆尹收岐家屬宗親陷以重法盡殺之岐逃匿名賣餅北海市中遇赦乃敢出

辛丑

減百官俸賣王侯半租賣關內侯以下官黃瓊免劉矩爲太尉盛允免种嵩爲司空遷司

徒以虞放為司空免劉寵代之

壬寅 劉矩免楊秉為太尉

中郎將皇甫規破羗有功被宦官譖下獄論輸左

校

癸卯 尚書朱穆論宦官被毀發疽卒

种嵩卒許栩為司徒劉寵免周景為司空

甲辰 邠鄉侯黃瓊卒

乙巳 春正月遣中常侍左悺之苦縣祠老子

渤海王悝謀不軌降瘦陶王

皇后鄧氏驕妬送暴室以憂死后父河南尹鄧萬

世兄子虎賁中郎將鄧會俱下獄死

中常侍侯覽為楊秉劾免 左悺具瑗俱為司隸

韓續劾悺自殺瑗貶都鄉侯

河南尹李膺按北海郡羊元羣賊罪元群賂宦官

膺竟反坐廷尉馮緄治單超弟山陽太守遷罪考

死於獄大司農劉祐沒入中常侍蘇康霸占田業

三人俱坐輸左校

楊秉卒陳蕃為大尉周景免劉茂為司空

起李膺為司隸校尉膺獨持風裁宦官張讓弟朔

為野王令貪殘畏膺威嚴匿讓合柱中膺破柱取

出殺之諸宦屏氣士被容接者名爲登龍門
立貴人竇氏爲皇后時采女田聖有寵帝欲立之
陳蕃以田氏卑微竇氏良家爭之甚力帝不得已
從之拜后父竇武特進槐里侯

以劉寬爲尚書令 初歛田畝稅錢

丙午 親祠老子於濯龍宮用郊天樂

老子之道雖大然亦人耳豈可躋與天並後世
遂以三清升于玉帝之上蓋肇端于此

小黃門趙津南陽大猾張汎奉事中官乘勢犯法
太原太守劉瓚南陽太守成瑨按其罪雖經赦並

考殺之宦官怨恚有司承旨奏當棄市山陽太守
單超沒入中常侍侯覽財產東海相黃浮誅殺徐
璜兄子下邳令徐宣並坐髡鉗輸左校陳蕃與杜
茂共諫不聽陳蕃又獨上疏極論中官疾之

按綱目附註云徐璜兄子宣求汝南太守李嵩
女不得遂將吏卒至其家載女歸射殺之東海
相黃浮收宣家屬無少長悉案棄市及查司馬
通鑑原文則曰浮收宣家屬無少長悉考之掾
史以下固爭浮曰徐宣國賊今日殺之明日坐
死足以瞑目矣即案宣罪棄市暴其尸與綱目

所載少異恐傳寫之誤若如綱目所云則浮之酷亦甚矣

河南張成善風角推占當赦教子殺人李膺收捕逢宥竟案殺之成交通宦官帝亦頗訊其占成子牢脩上書告膺等養天學游士交結諸郡生徒更相驅馳共爲部黨誹訕朝廷疑亂風俗帝大怒下郡國逮捕黨人布告天下案經三府太尉陳蕃郤之不肯平署帝益怒遂下李膺等於黃門北寺獄連及大僕杜密御史中丞陳翔及陳寔范滂等二百餘人策免陳蕃

史謂黨人之議始於房周二家賓客譏訕戲笑因而成隙固矣然諸君子之高立門戶互相標榜亦自足以取禍也

丁未永康元年 六月改

羗寇三輔 夏五月京師地裂

六月赦黨人歸田里禁錮終身改元永康

陳蕃既免朝臣震栗莫敢爲黨人言者賈彪入雒陽說城門校尉竇武尚書霍諝上疏訟之帝意稍解遣中常侍王甫就獄訊范滂曰古之脩善自求多福今之脩善身陷大戮身死之日願

八什系要 卷之十
埋首陽山側上不負皇天下不愧夷齊甫為改
容乃並解桎梏李膺又多引宦官子弟宦官懼
請于帝以天時宜赦乃大赦改元放歸田里書
名三府禁錮終身

秋八月巴郡人浴于池戲言黃龍見太守上之郡
吏諫不聽 司馬董卓破羗于三輔

冬十二月帝崩無嗣在位二十年壽三十六謚孝
桓皇帝廟號威宗葬宣陵遺詔復瘦陶王悝為勃
海王

尊皇后竇氏為皇太后后以采女田聖專寵殺田
聖與竇武陳蕃定策迎河間孝王曾孫解瀆亭侯
子宏立之年十二是為靈帝太后臨朝

河間孝王子淑封解瀆亭侯淑生長長生宏

戊申漢孝靈帝建寧元年

春正月帝即位改元 以竇武為大將軍陳蕃為
太尉與司徒胡廣參錄尚書事

追尊本生祖淑為孝元皇夫人為孝元后考長為
孝仁皇尊生母董氏為慎園貴人

以定策功封竇武為聞喜侯子機為涓陽侯兄子
紹為鄆侯靖為西鄉侯中常侍曹節為長安鄉侯

盧植說武辭賞不聽 封陳蕃為高鄉侯不受
段熲破東羗以為破羗將軍

周景卒以劉矩為太尉司空宣酆免以王暢為司
空暢免以劉寵為司空

秋九月陳蕃竇武謀悉誅宦官曹節等不克被節
等殺之夷其族遷竇太后于南宮

陳蕃竇武忠則忠矣宦官不問有罪無罪而欲
一槩誅之則過矣况武以定策功一門三侯使
彼得以藉口亦非正已而後正人也 竇武初
生其母并產一蛇送之林中母卒臨塋有大蛇

徑至喪所以頭擊柩若哀泣有頃而去 出本傳

以胡廣為太尉劉寵為司徒許栩為司空
處士徐禕卒

烏桓大人上谷難樓遼西丘力居俱稱王遼東蘇
僕延自稱峭王右北平烏延自稱汗魯王

巳酉 迎生母慎園董貴人於河間尊為孝仁皇后以后
允寵為執金吾兄子重為五官中郎將

夏四月青蛇見御座上大風雨雷雹詔公卿言事
郎中謝弼言直宦官惡之搆以他事掠死於獄

段熲大破東羗更封新豐侯

劉寵爲太尉許栩爲司徒

劉翬以附中常侍爲司空

冬十月復治鈞黨殺李膺等百餘人

李膺等雖廢錮天下士大夫皆高尚其道更相
標榜有三君八俊八顧八及八厨之號宦者疾
膺等每下詔輒申黨人之禁侯覽怨張儉尤甚
覽鄉人朱並告儉與同鄉別相署號圖危社稷
詔刊章捕儉等曹節諷有司奏諸鈞黨者虞放
李膺杜密朱寓荀昱翟超劉儒范滂等俱下獄
死者百餘人妻子皆徙邊天下豪傑有行義者

一切指爲黨人徙廢禁者又六七百人郭泰不
爲危言激論禍獨不及張儉亡命望門投止莫
不重其名行破家相容投李篤脫走復投孔褒
不遇其弟孔融匿之事泄亡走收褒融送獄未
知所坐融曰納藏者融也褒曰彼來求我非弟
之故吏問其母母曰家事任長妾當其辜郡不
能決上讞詔獨坐褒後黨禁解儉乃還鄉夏馥
聞儉亡命歎曰孽自己作空污良善一人逃死
禍及萬家何以生爲乃剪鬚變形入林慮山中
爲冶家傭人無知者張讓父死歸葬潁川合郡

畢至而名士無往者讓耻之陳寔獨吊及誅黨人不及寔初范滂等非訐朝政自公卿以下皆折節下之太學生爭慕其風申屠蟠獨嘆曰昔戰國之世處士橫議列國之王至於擁篲先驅卒有坑儒焚書之禍今之謂矣乃絕跡於梁碭之間因樹爲屋自同傭人居二年果有黨錮之禍

按李膺范滂諸君慷慨激烈視死如歸始終一節真可尚矣張儉首激其禍却乃亡命而逃負累他人吾無取焉夏馥以智全身優於儉遠矣若夫郭泰陳寔之明哲保身申屠蟠之見幾而作真不可及也

劉寵免以郭禧爲太尉

庚戌 河內婦食夫河南夫食婦

郭禧罷聞人襲爲太尉 劉翬罷橋玄爲司空

辛亥 帝加元服赦天下惟黨人不赦 立貴人宋氏爲皇后 以李咸爲太尉橋玄爲司徒來豔爲司空

壬子熹平元年 五月改

胡廣死 宦官侯覽坐專權驕奢收印綬自殺

竇太后以憂卒于南宮謚桓思

渤海王惺許中常侍王甫錢五十萬求復國既而遺詔復之惺以爲非甫力不與錢甫諷司隸段熲收渤海平日往來中常侍鄭颯等下獄誣奏迎立惺大逆不道逼惺自殺妃妾十一人子女七十人伎女二十四人皆死于獄傳相以下悉誅甫等十人俱封列侯

十二月會稽妖賊許生起句章自稱陽明皇帝遣楊州刺史臧旻丹陽太守陳寅討之

許栩免以袁隗爲司徒

癸丑 來豔免以楊賜爲司空尋免以中常侍唐衡弟珍

爲司空

甲寅 吳郡司馬孫堅召募精勇助州郡平許生

唐珍罷以許訓爲司空 樹暴長如胡人狀

乙卯 石刻議郎蔡邕古文篆隸五經於太學門外

立選用三五法三五者謂昏姻之家及兩州人不得交互爲官

司空黃瓊免以劉寵爲司空陳耽罷以許訓爲大尉

丙辰 永昌太守曹鸞請赦黨人下獄死因更考黨人禁五屬

許訓罷以劉寬爲太尉袁隗罷楊賜爲司徒劉逸
爲司空 御殿後大槐自扳倒豎

丁巳 市賈小民相聚爲宣陵孝子詔以爲太子舍人蔡
邕言改爲丞尉 以蔡邕言迎氣北郊

劉逸免陳球爲司空尋免陳耽爲司空劉寬免孟
馘爲太尉 楊賜免袁滂爲司徒

鮮卑寇遼西太守趙苞破之

時趙苞迎母就養爲鮮卑所獲載以擊郡苞悲
號遙謂母曰欲以微祿奉養不圖爲母作禍今
爲王臣義不得顧私恩毀忠節母曰人各有命

何得相顧以虧忠義苞遂力戰破賊母爲賊所
害苞歸葬訖謂鄉人曰食祿而避難非忠也殺
母以全義非孝也何面目立天下遂斃血而死
程子曰以君城降賊固不可然亦當求所以生
母之方柰何不顧而遽戰乎必不得已身往降
之可也徐庶於此蓋得之矣愚意曹劉並馳去
此就彼固無不可若鮮卑賊也就使降之身陷
於賊而城亦不能全苞蓋不幸而遭其變耳斃
血而死亦可哀已

戊午光和元年 三月改

置鴻都門學以處諸生之能爲尺牘詞賦及工書
鳥篆者

孟軻罷以中常侍張奉弟顥爲太尉九月罷陳球
代免橋玄爲太尉以袁滂爲司徒

陳耽免來豔爲司空卒袁逢代

宦官王甫譖宋后挾左道祝詛策收璽綬自至暴
室以憂死后父執金吾鄴下獄死

六月黑氣墮溫德殿庭中七月青虹見玉堂殿庭
中

召議郎蔡邕問災異章奏切直帝覽而嘆息中常

侍程璜使人言邕私事下獄劾大不敬棄市中常
侍呂彊力爲伸請減死髡鉗徙朔方

開西邸賣官二千石二千萬四百石四百萬其以
德次應選者半之或三分之一令長隨縣好醜豐
約有賈富者先入貧者到官倍輸又私令左右賣
公卿公千萬卿五百萬

靈帝爲侯時常苦貧及即位每嘆桓帝不能作
家居無私錢故賣官以爲私藏是時州郡官貪
汚已極又欲其輸錢於上是教其爲貪也如是
而民不窮盜不起寧有是理哉

是年侍中寺鷄雌化雄京師馬生人

巳未 袁滂免大鴻臚劉郃爲司徒

橋玄罷以太中大夫段熲爲大尉袁逢罷張濟爲
司空 司隸校尉陽球杖殺王甫太尉段熲下獄
自殺

王甫與曹節弄權段熲以輸貨得太尉阿附之
甫節父兄弟爲鄉校牧守令長者布滿天下
所在貪暴甫養子吉爲沛相尤殘酷凡殺人皆
磔尸車上宣示夏月腐爛則以繩穿其骨周徧
一郡乃止視事五年凡殺萬餘人陽球爲尚書

令常發憤曰使我作司隸此曹安得容乎既而
果遷司隸甫遣門生於京兆界辜權官財物七
十餘萬京兆尹楊彪發之時甫休沐里舍段熲
以日食自劾球詣闕謝恩奏其過惡收甫熲送
雒陽獄及甫子永樂少府萌沛相吉球自臨考
五毒備極父子悉死于獄熲亦自殺磔甫尸於
夏城門沒入財產妻子皆徙比景球既誅甫欲
以次除曹節等節白帝徙爲衛尉

封中常侍呂彊爲都鄉侯不受彊復上疏帝知其
忠而不能用

以上祿長和海言寬黨人從祖以下得解釋
以劉寬爲太尉

司徒劉郃與少府陳球尚書劉納欲復陽球司隸
誅曹節等事泄曹節等白帝曰郃等交通書疏謀
爲不軌帝大怒下劉郃陳球劉納陽球于獄俱死
以楊賜爲司徒

是年洛陽女生兒兩頭四臂

庚申

立貴人何氏爲皇后

作畢圭靈昆苑

辛酉

劉寬免許馹爲太尉 楊賜罷陳耽爲司徒
作列肆于後宮使采女販賣更相盜竊爭鬪帝着

商賈服燕飲爲樂又於西園弄狗着進賢冠帶綬
又駕四驢躬自操轡驅馳周旋京師轉相倣效呂
疆上疏諫

壬戌

詔公卿舉刺史二千石爲民害者太尉許馹司空
張濟承望內官受取貨賂宦官子弟賓客貪穢皆
不敢問而虛糾邊遠小郡清修有惠化者二十六
人吏民詣闕陳訴司徒陳耽上言公卿所舉率黨
其私帝以讓馹濟所徵者悉拜議郎
陳耽免袁隗爲司徒 許馹免楊賜爲太尉
以桓典爲侍御史宦官畏之 起四百尺觀

癸亥 五原山岸崩

甲子中平元年 十二月改

春二月鉅鹿張角以黃老術惑衆自稱天公將軍

以黃巾為號謀反約宦官封諂等為內應

三月以后兄河南尹何進為大將軍

以宦官呂強言赦黨人

遣中郎將盧植討張角皇甫嵩朱儁討潁川黃巾

太尉楊賜免鄧盛為太尉

司空張濟罷大司農張溫為司空

宦官趙忠張讓譖呂強自殺侍中向栩郎中張鈞

俱以論宦官下獄死

盧植為小黃門左豐所譖檻車徵還以中郎將董

卓代

皇甫嵩朱儁與騎都尉曹操合兵破黃巾張角死

戮其屍傳首京師

巴郡張修亦以妖術反寇郡縣

雒陽女子生兒兩頭一身江夏婦人浴化為龜

十二月改元中平

靈帝常言張常侍是我公趙常侍是我母由是

宦官無所忌憚第宅擬於宮室帝嘗欲登永安

侯臺宦官恐望見居處使人諫曰天子不當登
高登高則百姓散帝遂不敢登臺至封諂等交
通黃巾謀危社稷事已敗露不惟不能明正其
罪反納其譖言置正人於死昏弱一至於此何
以爲君哉

乙丑

袁隗免崔烈因傳母入錢五百萬爲司徒謂其子

鈞曰外議何如鈞曰論者嫌其銅臭

以破黃巾功封宦官張讓等十三人爲列侯

皇甫嵩忤宦官徵還以司空張溫爲車騎將軍代
之以特進楊賜爲司空賜卒以光祿大夫許相

爲司空

諫議大夫劉陶前司徒陳耽坐論宦官下獄死

造萬金堂爲私藏 洛陽民生兒兩頭四臂

丙寅

太尉張延罷遣使即拜張溫爲太尉三公在外拜
始此

丁卯

以孫堅爲長沙太守封烏程侯

張溫免崔烈爲太尉尋罷曹嵩爲太尉

司空許相爲司徒光祿勳丁宮爲司空

前太丘令陳寔卒

戊辰

曹嵩罷求樂少府樊陵爲太尉尋罷射聲校尉馬

日碑代

許相罷司空丁宮為司徒光祿勳劉弘為司空
帝自稱無上將軍耀兵於平樂觀

劉焉為益州牧劉虞為幽州牧焉魯恭王之後虞
東海恭王五世孫州牧自始此 青徐黃巾復起

巳巳

帝禪五月改元光熹七月改元昭寧
帝協九月改元永漢 俱革除

夏四月馬日碑免以幽州牧劉虞為太尉

丙辰帝崩在位二十二年壽三十四謚孝靈皇帝
葬文陵 初帝屢失皇子及何后生子辯養於史
道人家號曰史侯帝所幸王美人任娠畏何后妬

服藥除之而胎安不動又數夢負日而行生皇子
協后遂醜殺美人帝怒欲廢后諸宦官固請乃令
董太后自養協號曰董侯帝以辯輕佻無威儀欲
立協為太子猶豫未決會疾篤乃以協屬宦官蹇
碩立為太子及帝崩何后立其子辯年一十四歲
改元光熹 封協為渤海王以袁隗為太傅與何
進參錄尚書事進既秉政袁紹勸進悉誅宦官進
收蹇碩誅之遷董太后於河間以兵圍車騎將軍
董重重自殺太后暴崩
徙協為陳留王

八代紀要 卷之一
秋七月何進召董卓袁紹等兵入事泄宦官張讓
段珪等殺何進劫帝及何太后陳留王出走袁紹
等矯制殺樊陵許相捕諸宦官悉誅之凡二千餘
人盧植率兵追及讓珪投河死帝還宮改元昭寧
失傳國璽 劉弘免董卓自爲司空

秋九月董卓議廢立袁紹不從出奔冀州盧植免
官去隱于上谷卓以議報袁隗隗報如議遂脅太
后詔廢帝爲陳留王袁隗解帝璽綬扶下殿立協
爲帝年九歲是爲獻帝改元永漢遷何太后於永
安宮酖殺之 即拜劉虞爲大司馬

董卓自爲相國贊拜不名入朝不趨

以司徒王琬爲太尉司空楊彪爲司徒光祿勳荀
爽爲司空 又以袁紹爲渤海太守袁術爲後將
軍曹操爲驍騎校尉操逃歸陳留起兵討卓
董卓欲收名流復黨人爵位

召處士申屠蟠不至

詔除光熹昭寧永漢年號止稱中平六年

宦官乃人主左右給使以供掃除者不任以事
自不敢竊弄權柄曹操所謂一獄吏治之足矣
進乃召外兵以盡誅之可乎自是以後禮樂征

代俱不出自天子人主擁虛位而已

人代紀要卷之十一

人代紀要卷之十一

明吳興顧應祥編集

大埔黃泉校刊 江陰湯明善校正

庠生倪佩 臧繼華同校

庚午漢獻帝初平元年

按帝協昭烈曾謚為愍帝是時漢中傳聞遇害古無生謚之理世史正綱以獻帝為曹魏所謚止稱帝協綱目稱獻帝今從綱目

董卓弑弘農王 奏免太尉黃琬司徒楊彪以光

祿勳趙謙為太尉太僕王允為司徒 逼帝遷都

長安驅京師百姓西入關自留屯畢圭苑 焚洛陽宮廟發諸陵及公卿墳墓收其珍寶 時關東郡縣起兵討卓以袁紹爲盟主董卓遂殺司徒袁隗太僕袁基夷其族 荀爽卒以光祿大夫种拂爲司空袁術據南陽表孫堅爲豫州刺史 以劉表爲荊州刺史 有司以蔡邕議奏和安順桓四帝無功德不宜稱宗請除尊號制曰可初和帝號穆宗安帝號恭宗順帝號敬宗桓帝號威宗至是除之

按袁隗爲帝太傅董卓廢帝不能死又親解帝璽綬扶之下殿所謂大臣者顧若是乎今又不能逃卓之誅滅可爲阿附權臣者之戒

董卓聞各處起兵置弘農王於閣上使郎中令李儒進醜曰服此藥可以避惡王曰我無疾欲殺我耳不肯飲儒強之王不得已與妻唐姬飲讌歌舞泣別謂姬曰卿王者妃勢不復爲吏民妻自愛遂飲藥而死姬歸鄉里其父欲嫁之誓不許李傕破長安鈿掠得姬欲妻之不從而終不自名尚書賈詡知之白獻帝迎置園中仍拜爲弘農王妃錄之一以見董卓之惡一以表唐

姬之操云

辛未 關東諸將奉大司馬劉虞為帝拒之 董卓自為
太師位諸侯王上 孫堅兵進討董卓卓走堅入
洛陽修陵廟得傳國璽 袁紹逐冀州牧韓馥自
領州事表曹操為東郡太守 种拂免以光祿大
夫淳于嘉為司空 趙謙罷以太常馬日磾為太
尉 劉焉以米賊張魯為督義司馬掩殺漢中太
守斷斜谷閣帝使其子奉車都尉劉璋諭之焉留
不遣 蚩尤旗見董卓殺張温 長沙有人死經
月復生

初張温討北宮伯玉董卓為破虜將軍統於温
卓不順孫堅勸温以軍法斬卓温不能至是太
史望氣言當有大臣戮死卓使人誣告温罪笞
殺以應之

壬申

司徒王允使中郎將吕布誅董卓夷三族以布為
奮威將軍封温侯共秉朝政蔡邕坐上驚嘆執下
獄死 黃巾寇兖州殺刺史劉岱曹操入據之自
稱刺史 董卓將李傕郭汜等舉兵入長安殺王
允吕布自武關奔南陽又奔袁紹催汜與樊稠張
濟自為將軍 以皇甫嵩為太尉楊彪為司空

嵩免周忠爲太尉 以馬騰爲將軍屯郿

初王允以宋翼爲馮翊王宏爲扶風催等欲殺
允先徵翼宏遣使謂翼曰催汜以我二人在
外故未危王公今日就徵明日俱族計將安出
翼曰雖禍福難量然王命不可避也宏曰關東
義兵鼎沸若舉兵共討催等轉禍爲福之機也
翼不從遂俱就徵被殺向使宋翼聽王宏之言
舉兵與關東之兵相應催汜豈敢縱其惡哉况
當時召之者催汜之命非王命也全小節而失
大義可謂智乎

王允始與僕射士孫瑞密謀誅卓欲假呂布之
力甘心下之及卓既除自以無復後患意得志
滿呂布勸以卓財物班賜公卿將校士孫瑞議
下詔赦卓部曲俱不從以致有催汜之變忠於
漢室則有之矣處功之道似未盡也若士孫瑞
口不言功竟免於禍可謂明哲保身者矣

癸酉 周忠免朱儁爲太尉 楊彪免趙溫爲司空尋免
張喜爲司空 劉虞討公孫瓚不克被殺 以陶
謙爲徐州牧 是年華山崩裂

甲戌興平元年

帝冠 追尊母王夫人爲靈懷皇后 陶謙表劉備爲豫州刺史謙卒備兼領徐州 李傕郭汜樊稠自開府如三公 劉焉卒以其子璋爲益州牧 袁術表孫策爲懷義校尉策遂據有江東

乙亥 立貴人伏氏爲后 李傕郭汜樊稠爭權傕殺樊稠自爲大司馬劫帝入其營遷于北塢與郭汜相攻帝遣僕射皇甫鄴和斛不從傕將楊奉謀殺傕事泄叛去將軍張濟迎帝東歸以濟爲驃騎將軍開府帝至弘農濟與催汜合追至陝董承楊奉以帝渡河幸白波帥李樂營 劉虞故吏鮮于輔迎

虞子和合袁紹兵攻公孫瓚破之 是年曹操破 呂布于定陶布走歸劉備 以曹操爲兖州牧

丙子建安元年

袁術勸呂布襲下邳張飛敗走布虜備妻子備降于布因袁術軍糧不繼布怒復與劉備攻術

秋七月帝還洛陽改元 曹操遷帝于許昌自爲大將軍封武平侯 以袁紹爲太尉操自爲司空行車騎將軍事總百官 曹操以荀彧爲侍中荀攸爲軍師郭嘉爲祭酒以北海太守孔融爲將作大匠 袁術與呂布結婚布復攻劉備備走投許

昌曹操復以爲豫州刺史

丁丑 袁術拘孫堅妻奪得傳國璽自以名應讖言遂稱帝于壽春 以呂布爲左將軍討術布與術絕婚擊術破之袁紹自爲大將軍兼督冀青幽并四州孫策爲會稽太守討袁術

戊寅 將軍段煨等平李傕夷三族 曹操擊殺呂布以劉備爲左將軍 孫策爲討逆將軍封吳侯

己卯 袁紹攻公孫瓚瓚自焚死以鮮于輔都督幽州袁術敗死故廣陵太守徐璆得傳國璽獻之 袁紹攻許曹操進兵黎陽尋還屯官渡 董承受帝

衣帶中密詔與劉備討曹操

庚辰 曹操知董承謀殺承夷三族承女董貴人方娠亦遇害 操親起兵攻劉備備奔冀州投袁紹操拔下邳獲備妻子擒關羽以爲偏將軍待之甚厚

袁紹兵襲曹操於白馬關羽刺殺紹將顏良操引兵而西紹兵過河追之又斬紹將文醜紹兵敗

曹操表關羽爲漢壽亭侯關羽奔還劉備 袁紹復攻曹操於官渡紹軍大敗輜重圖書珍寶俱爲操所得前後所殺七萬餘人 是年孫策卒弟權代曹操表權爲討虜將軍 張魯以鬼道惑衆據

漢中

辛巳 曹操攻劉備於汝南備奔荊州依劉表 張魯取

巴郡詔以為漢寧太守

按張魯乃張道陵之孫道陵初客于蜀學道鶴鳴山中造作符書以惑百姓受其教者出米五斗謂之五斗米賊同時起者張角張脩其術畧同後角被誅脩亦亡惟道陵傳子衡衡傳魯世以鬼道惑眾愚民被其誑誘其勢日盛朝廷不能制以為漢寧太守

壬午 袁紹慙憤發病愛後妻劉氏所生幼子尚遂以為

後以長子譚繼兄後出為青州刺史次子熙為幽州刺史紹卒譚尚相攻 是年越雋男化為女

癸未

甲申 曹操攻破鄴自領冀州牧擄袁熙妻甄氏與子丕為妻 丹陽郡吏殺太守孫翊翊妻徐氏以計誅之

乙酉 曹操破青州斬袁譚幽州將吏逐袁熙降操熙尚俱走烏桓 以荀悅為侍中 曹操以陳琳為記

室 荀悅著申鑒作漢紀

丙戌 仲長統為尚書郎

丙戌

仲長統

尚書郎

丁亥 曹操破烏桓袁熙袁尚走遼東公孫康斬之
劉備見諸葛亮于隆中

戊子 罷三公官曹操自爲丞相 以馬騰爲衛尉以其
子超爲偏將軍代領其衆 曹操殺孔融夷其族
劉表卒曹操至新野表子劉琮舉州降 劉備奔
江陵操追又走夏口曹操兵東下孫權遣周瑜魯
肅與劉備迎擊大破曹兵于赤壁曹操北還

己丑 孫權表劉備領荊州牧 納妹於備以固好

庚寅 曹操作銅雀臺于鄴 孫權將周瑜卒魯肅代領
其衆 劉備以龐統爲侍中從事

辛卯 曹操以其子丕爲丞相副 馬超韓遂反曹操擊
破之超遂奔涼州 劉璋迎劉備入蜀討張魯備
留諸葛亮關羽守荊州

壬辰 孫權徙治建業作石頭城 曹操擊孫權
曹操誅馬騰夷三族

癸巳 曹操稱魏公加九錫 始建魏宗廟社稷置尚書
侍中六卿 曹操以三女憲節華俱進爲夫人聘
以東帛玄纁五萬匹小者待年於國

甲午 三月曹操進位諸侯王上 馬超去張魯奔劉備

劉備攻成都劉璋出降遷于公安劉備自領益州
牧以諸葛亮為軍師 伏皇后懼曹操密書與父
完圖之事泄操令郝慮華歆入宮收后璽綬牽出
下暴室幽死所生二皇子俱醜殺之

按劉備之取劉璋或以為非義或曰正所以為
義以愚觀之劉焉見漢室將亂以益州有天子
氣求為益州牧陰有不臣之心造乘輿斷劍閣
遣米賊殺漢使助馬騰襲長安固為有罪然當
是時雖有天子其實政出曹操故人比有覬覦
之心及焉死璋未有過遣人請備而襲之恐

非王者討罪之所為也况備攻成都之時蜀精
兵尚有三萬穀帛可支一年吏民咸欲死戰璋
言父子在州二十餘年無恩德以加百姓攻戰
三年飢膚草野以璋故也何心能安遂開門出
降群下莫不流涕則璋亦仁厚之人也

又劉備入成都劉璋兄瑁已死妻吳氏寡居群
下勸備納之備疑同族法正曰論其親疎何與
晉文之於子圉乎遂納吳氏為夫人法正一言
而使先主未免為盛德之累惜哉

乙未

立曹操中女曹節為后 劉備孫權分荊州

曹操取漢中張魯奔自巴中出降以爲鎮南將軍
張魯三世以鬼道惑衆圖爲不軌王法之所必
誅者也聞曹操兵陷陽平斬其弟衛將稽顙歸
降其黨閻圃說曰今以急往其功爲輕不如且
依巴中然後委質功必多也於是封其庫藏入
山避鋒操入南鄭嘉其善意遣人慰安魯乃出
拜鎮南將軍封閻中侯邑萬戶將還中國待以
客禮五子及閻圃皆爲列侯操嘗曰寧我負人
毋人負我何獨於魯而嘉之蓋邪道之易於惑
人也後世封其子孫代爲天師操實階之操真

萬世之罪人也哉

丙申

曹操進爵魏王

以鍾繇爲相國

曹操因匈奴來朝留于鄴分五部散處汾晉間又

徙武都氐于扶風天水

晉夷狄亂華實始于此

丁酉

曹操用天子車服以子丕爲王太子

孫權降于

曹操以華歆爲御史大夫

按華歆初與管寧爲友共鋤菜見地有金寧揮
鋤不顧歆提而擲之人以是知其優劣今觀歆
甘心事操爲弑逆之事豈特優劣而已哉蓋少

時或有志為善及為利欲所動則靡所不至矣
士君子立身一敗而萬事瓦裂可不戒哉

戊戌

己亥

丁酉

曹操殺丞相主簿楊脩
趙雲敗曹兵劉備取漢中
自稱為漢中王以子禪為王太子
曹操號其夫人為王后
關羽攻樊城取襄陽執于禁殺龐德
襄陽刺史胡脩太守傅方皆降于羽
冬十月孫權使呂蒙襲江陵曹操以兵救樊城關羽敗走為潘璋所殺
曹操以孫權為荊州牧
呂蒙卒

庚子延康元年

三月改

冬十一月魏文帝黃初元年

春正月曹操卒年六十六歲謚武王追尊為魏高

祖武皇帝葬高陵子丕嗣自為丞相冀州牧

三月改號延康元年
曹丕以賈詡為太尉華歆

為相國王朗為御史大夫
曹丕立法宦者官不

得過諸署令
立九品法置州郡中正

冬十月左中郎將李伏太史令許芝言魏當代漢

見於圖緯魏群臣因表請曹丕篡位帝乃告高廟

遣使奉璽綬禪位于魏丕上書三讓乃為壇於繁

陽升受璽即皇帝位燎祭天地改元黃初廢帝為

山陽公用天子禮樂蜀中傳聞已遇害謚曰愍帝

漢自高祖乙未年入關己亥年即皇帝位傳十
二主至孺子嬰居攝三年戊辰為王莽所篡自
入關始計二百一十四年自即位始計二百。

九年都長安是謂西漢光武自壬午年起兵春
陵癸未年新市平林兵立淮陽王劉玄乙酉年
光武即皇帝位傳十二主至帝協延康元年庚
子為曹丕所篡計一百九十五年都洛陽是謂

東漢兩漢二十四帝共四百〇四年

三代以下人臣竊君位者始於王莽不過因君
弱臣強潛移國祚而已至於假禪受之美名逼

奪君位以啓後世僭竊之端寔自丕始

辛丑

魏文帝黃初二年
漢昭烈皇帝章武元年

魏封孔羨為宗聖侯奉孔子祀 夫人甄氏失寵

有怨言賜死 祀太祖於洛陽建始殿 築凌雲

臺高一十三丈 以漢楊彪為光祿大夫

求珍物于孫權 置護鮮卑烏桓校尉

夏四月劉備稱帝成都年六十歲改元章武元年

以諸葛亮為丞相許靖為司徒 立夫人吳氏為

后吳氏乃劉瑁妻也 張飛為其下所殺

孫權遣使降魏封為吳王遣趙咨入謝 徙治武

昌立子登為太子

壬寅

吳大帝黃武元年

魏主立法后家不得輔政立貴嬪郭氏為皇后

魏徵孫權任子不從漢主為吳將陸遜所敗將

軍黃權降于魏

按黃權劉璋將也璋敗降漢主今又降魏

冬十月孫權改元黃武拒魏使鄭泉聘漢主于白

帝

癸卯漢帝禪建興元年

五月改

魏以鍾繇為太尉

夏四月漢主崩于永安宮在位二年壽六十三謚

昭烈皇帝葬惠陵太子禪即位諸葛亮受遺輔政

封武鄉侯五月改元建興元年立張飛女張氏

為皇后遣鄧芝使吳

甲辰

魏以舟師伐吳臨江而還魏立太學

乙巳

魏復以舟師伐吳至江而返

漢諸葛亮南征討雍闓擒孟獲南中平

吳以顧雍為丞相

丙午

夏五月魏主殂在位六年壽四十謚文皇帝廟號

世祖葬首陽陵太子叡即位司馬懿受遺輔政

徵處士管寧不至

丁未 魏明帝 太和元年

魏大營宮室 魏主棄妃虞氏立貴嬪毛氏為后

魏議復肉刑不果

漢諸葛亮出師漢中圖中原

戊申 魏以公孫淵為遼東太守

漢諸葛亮伐魏敗于街亭

吳敗魏師于石亭

巳酉 吳黃龍元年稱帝

魏制以藩王入繼者不得顧私親 立聽訟觀設

律博士

夏四月吳武昌黃龍見孫權稱皇帝改元黃龍追

尊父破虜將軍堅為武烈皇帝母吳氏為武烈皇

后兄討逆將軍策為長沙桓王太子登為皇太子

張昭為輔吳將軍 秋九月遷都建業

庚戌 魏假司馬懿黃鉞攻蜀 立郎吏課試法

吳發兵浮海求夷洲亶洲欲俘其民以益衆

辛亥 漢諸葛亮圍祁山斬魏將張郃

吳野蠶成繭野稻成禾改明年為嘉禾元年

壬子 吳嘉禾元年

癸丑 魏青龍元年

春正月魏青龍見于摩陂井中改元青龍

公孫淵稱臣于吳遣使拜為燕王張昭諫不從淵斬吳使首獻于魏封樂浪公

甲寅 魏山陽公卒魏主素服發哀謚漢孝獻皇帝葬于禪陵

漢諸葛亮卒于師

吳潘璿平武陵蠻

乙卯 魏郭太后以憂卒 魏作洛陽宮 魏主無嗣養宗室二子芳詢秘之或云芳任城王楷之子是年

以芳為齊王詢為秦王 崇華殿災復建

魏張掖湧石負圖 魏以馬易珍物于吳

魏以馬易珠璣翡翠玳瑁於吳孫權曰此皆孤所不用而可以得馬孤何愛焉先是曹丕求珍物於吳已為孫權所誚今曹叡又以馬易之魏之諸臣不諫何也

丙辰 魏令公卿舉才德兼備之士

吳鑄大錢以一當五百 吳張昭卒

古者日中為市以物易物緣物不常有而價有高下不同故人君置泉布以通之無非欲便民

也今因國用不足而鑄大錢以罔天下之利民
心豈樂從乎後世以鈔准錢亦類是

丁巳

魏景初元年以山莊縣黃龍見改建丑月為歲首三月為夏四月

立南北郊營圓丘方丘 魏主與郭夫人遊後園

毛后知而問之魏主以左右泄之殺十餘人賜后
死 鑄銅人起土山於芳林園 奪吏民妻以配

士 公孫淵自稱燕王改元紹漢

戊午

漢延熙元年

吳赤烏元年

魏司馬懿擊遼東克之斬公孫淵 以韓暨為司
徒 魏主疾立郭夫人為后召司馬懿入朝以曹
爽為大將軍

是年春正月漢主立張氏為后大赦改元延熙以
子璿為太子璿為安定王

吳鑄當千大錢 秋八月武昌麒麟見有司請改

元吳主以赤烏集前殿乃改元赤烏

己未

春正月魏主殂在位十三年壽三十六謚明皇帝

廟號烈祖葬高平陵太子芳即位年八歲復以建

寅月為歲首以明年建寅月為正始元年正月以

建丑月為后十二月 司馬懿曹爽受遺輔政

何晏為尚書

漢以蔣琬為大司馬

庚申

魏齊王芳

正始元年

辛酉

魏以大牢祭孔子以顏淵配

魏置淮南北屯田廣漕渠 管寧卒于魏

吳太子登卒

壬戌

吳立子和為太子霸為魯王

癸亥

魏主加元服

漢以費禕為大將軍

正月吳騶虞見

甲子

吳以陸遜為相

乙丑

漢蔣琬卒

吳殺太子太傅吾粲陸遜卒子抗代

吳太子和與魯王霸同宮禮秩如一群臣以為

言始分宮別僚由是有隙吳主長女適全琮次

女適朱據全公主與太子母王夫人有隙權寢

疾遣太子禱桓王廟太子乘便過其妃家全主

遂譖言太子不魯至廟專在妃家計議王夫人

見上寢疾有喜色權信之太子寵衰王夫人憂

死霸黨楊竺全寄從而毀之陸遜屢諫吾粲請

使魯王鎮夏口出楊竺全寄不得在京權怒誅

八代紀要 卷之二十一 十七
粲數遣使責陸遜憤恚而卒

丙寅 魏曹爽專政何晏秉機司馬懿稱病

漢以姜維為衛將軍 與費禕並錄尚書事

丁卯 魏曹爽遷其太后于永寧宮

戊辰 魏以徐邈為司空不受

己巳 魏嘉平元年

春正月魏曹爽奉帝謁高平陵司馬懿殺爽及何

晏等奉帝還宮 以司馬懿為丞相加九錫復辭

不受 夏四月改元嘉平

庚午 秋八月吳廢太子和賜魯王霸死誅其黨楊竺全

寄等 冬十一月立少子亮為太子

孫權所寵潘夫人生少子亮愛之全公主既與

太子有隙遂數稱亮美權遂廢和賜霸死陳正

陳象以切諫族誅朱據亦以諫賜死昏悖至此

安能延其國祚之久乎

辛未 吳太元元年

壬申 魏太尉王凌謀立楚王曹彪誅司馬懿事覺司馬

懿殺凌窮治其黨俱夷三族賜曹彪死置諸王公

於鄴不得與人交通 秋八月司馬懿卒年七十

三謚文貞改文宣後追贈晉高祖宣皇帝子師繼

事葬首陽山不墳不樹 吳有神人自稱王表語
言飲食與人無異不見其形 夏五月立皇后潘
氏大赦改元太元元年

壬申

二月吳改元神鳳
四月吳主亮建興元年

魏司馬師自爲大將軍

吳以故太子和爲南陽王居長沙子奮爲齊王居
武昌休爲琅邪王居虎林 二月大赦改元神鳳
夏四月吳主疾潘后使問中書令孫弘以吕后專
制故事諸宮人畏后虐伺其困卧縊殺之
吳主孫權殂年七十一謚大皇帝葬蔣陵太子亮

即位改元建興 以諸葛恪爲太傅

徙齊王奮於豫章

癸酉

漢盜殺費禕

吳殺諸葛恪以孫峻爲丞相賜南陽王和死和妃
張氏自殺妾何氏撫其子皓

甲戌

魏帝髦

正元元年

吳五鳳元年

魏中書令李豐太常夏侯玄與后父光祿大夫張
緝惡司馬師專權謀欲去之事覺皆夷三族廢張
后 魏主意不平 秋九月司馬師廢其主爲齊
王遷河内 冬十月司馬師迎明帝弟東海定王

霖之子髦立之年一十四改元正元

吳以大鳥五見改元五鳳

乙亥 魏揚州都督毋丘儉刺史文欽起兵討司馬師不

克欽奔吳儉走死

司馬師尋卒謚忠武後晉追謚景皇帝廟號世宗

弟昭繼事

丙子 魏甘露元年六月改元吳太平元年

夏四月魏司馬昭自稱大都督假黃鉞服袞冕赤

舄 六月魏主以甘露降改元

漢以姜維為大將軍伐魏師敗

九月吳孫峻卒以其從弟綝為侍中輔政改元太

平

丁丑 魏揚州都督諸葛誕起兵討司馬昭昭奉魏主攻

之吳兵救誕不克

戊寅 漢景耀元年 吳景帝休永安元年

魏司馬昭拔壽春殺諸葛誕 司馬昭自為相國

封晉公加九錫復不受

魏主行養老禮以關內侯王祥為三老鄭小同為

五更 漢以史官言景星見改元景耀

吳主亮惡孫綝專欲除之謀泄秋九月孫綝廢亮

爲會稽王年十六迎孫權第六子琅邪王休立之
是爲景帝十月即位改元永安以緄爲相封兄子
皓爲烏程侯 十二月吳主休以臆會殺孫緄

巳卯

熒惑星化爲童子降于吳

庚辰

魏元帝

景元元年

夏五月魏主髦憤司馬昭專恣召侍中王沈尚書
王經散騎常侍王業謂曰司馬昭之心路人所知
也吾不能坐受廢辱與卿等共討之王經曰權在
其門日久人心不顧逆順宿衛寡弱禍殆不測魏
主曰吾行之決矣沈業奔告司馬昭使中護軍賈

充爲備魏主知事泄帥左右攻相府稱敢有動者
族誅相府兵不敢戰賈充叱諸將曰司馬公畜養
汝輩正在今日太子舍人成濟抽戈刺魏主刃出
於背司馬昭召百寮謀之僕射陳泰請誅賈充以
謝天下昭不從歸罪成濟夷其族又以太后令廢
魏主髦爲庶人太傅司馬孚言之始塋以王禮髦
死年二十歲司馬昭以王經不附巳收斬之經辭
其母母笑曰人誰不死正恐不得其所何恨之有
王沈以功封安平侯

魏主髦以君討臣而謂之大逆不道廢爲庶人

王沈王經皆天子之臣也一則以奔告而封侯
一則以不附而被殺昏亂之朝一至於此可勝
嘆哉

六月司馬昭迎燕王宇之子常道鄉公璜改名奐
立之年一十五改元景元

漢追謚關羽為壯繆侯張飛為桓侯

吳會稽王自殺

辛巳 鮮于索頭部拓跋力微遷盛樂此元魏之始

壬午 魏司馬昭殺中散大夫嵇康 遣鄧艾鍾會伐蜀

嵇康文辭壯麗好言老莊而尚竒任俠與阮籍

阮咸山濤向秀王戎劉伶號竹林七賢

吳立子靈為太子

癸未 漢炎興元年

魏司馬昭受九錫始稱晉國公

漢姜維伐魏不克改元炎興 冬十月鄧艾兵自

陰平魚貫入蜀漢主禪降北地王諶哭於昭烈之

廟先殺妻子後自殺漢亡

大蜀漢自昭烈辛丑至帝禪癸未降魏凡二主四

十三年而亡

甲申 魏咸熙元年

魏鍾會構鄧艾罪司馬昭命衛瓘以檻車徵艾鍾會以蜀兵欲反俱被殺 三月魏以司空王祥爲太尉征北將軍何曾爲司徒尚書左僕射荀顛爲司空 司馬昭進爵爲晉王用天子服噐 夏五月改元 封劉禪爲安樂公 司馬昭以子炎爲副相國尋立爲晉世子

司馬昭既進爵爲王荀顛等俱相率下拜王祥曰王公相去一階安有天子三公可輒拜人者獨長揖昭曰今日然後知君見顧之重夫祥之不拜昭固自以爲知禮矣獨不思躬受魏髦養

老乞言之禮日擊其被弑既不能討又不能去而醜顏在位既而又委質於晉可謂知禮乎 吳主卒濮陽王興左將軍張布廢太子靈而立故太子和之子烏程侯皓皓既立好酒色興布悔之皓聞執興布徙廣州道殺之夷三族

...

...

...

...

...

...

...

...

...



